

Misigissutsikkut ikiuigasuartarneq pillugu apeqquteqaat aallaavigalugu oqallinnissamik siunnersuut

(Inatsisartuni ilaasortaq Doris Jakobsen - Siumut)

Akissuteqaat

(Peqqissutsimut Naalakkersuisoq, Agathe Fontain)

Naalakkersuisut sinnerlugit Inatsisartuni ilaasortaq Doris J. Jensen, Siumut qutsavigerusuppara misigissutsikkut ikiuigasuartarneq pillugu oqallinnermut matumunnga suliniuteqarsimammat.

Naalakkersuisut apeqquteqaat aallaavigalugu oqallinnissamik siunnersuuteqartoq isumaqatigaat, tassa innuttaasup kialuunniit sakkortuumik misigisaqarsimalluni ajornartorsiutini kisimiilluni nammassanngikkai. Tarnikkut ikiueqqaarneq tassaasinnaavoq suliamut tunngatillugu naleqquttumik ilinniarsimasumit ikiorneqarnissaata tungaanut imaluunniit ajornartorsiornerup qaangiunnissaata tungaanut inummumut eqqarsartaatsikkut ajornartorsiuteqartumut ikiuineq. Tamanit tusarnaarsinnaasunit, akuerinnissinnaasunit aamma inunnut allanut qanilaarnermik isumassuinermillu tunniussisinnaasunit tarnikkut ikiueqqaartoqarsinnaavoq, taamaattumillu inuit tamarmik atugarisinnaavaat. Peqqinnissaqarfimmi napparsimasunut qanigisaasunulluunniit tarnikkut ikiueqqaartoqarnissaa pisariaqartinneqarpat peqqinnissamut tunngasutigut sullissisut tapersersuisinnaassapput.

Napparsimasut tapersersornissaannut aaqqissuussinernik assigiinngitsunik qulaajaanissamik misileraanissamillu siunertaqarluni ukiuni sisamani sivilissuulimmik misiligitut pilersaarummut tunngatillugu 2021-mi Kalaallit Peqqissartut Illuat danskit aningaasanut inatsisaannit aningaasanik tunineqarpoq. Tassunga atatillugu ilaatigut 2023-mi tarnip pissusiinik immikkut ilisimasalinnut avataaneersunut 200.000 kr.-t immikkoortinneqarsimapput. Neqeroorummi pineqarput napparsimasut ilungersunartorujussuarmik anniaatillit, soorlu kræftertut allanillu ilungersunartunik nappaatillit. Tarnip pissusiinik ilisimasallit kalaallit atorineqarput, tassani inunnik ataasiakkaanik oqaloqateqarnerit saniatigut kræftimik napparsimasunik imajaallutik eqimattanik oqaloqateqartarput. Peqqissartut illuanni napparsimasut neqeroorummik atuisut amerlapput, aamma neqeroorut assut naammagisimaarneqarpoq. Qarasaasiaq atorlugu oqaloqatigiinnikkut katsorsaalluni oqaloqatiginnittoqartarpoq. Tamatuma saniatigut aamma kalaallimik kulturilerinermik attaveqatigiinnermillu suliaqartussamut 2023-mi 350.000 kr.-t immikkoortinneqarsimapput, taanna ilaatigut napparsimasunut qanigisaasunullu paasissutissanik attuumassuteqartunik assigiinngitsunik qulakkeerinninnissamik suliaqassaaq. Peqqissartut illuat ilaatigut illorsuarmi skærminik paasissutissiiffinnik peqarpoq, tassani tarnip pissusaanit immikkut ilisimasalimmit avataaneersumit ikiorneqarnissaq anguniarlugu oqaloqateqarnissamut neqerooruteqarnera paasissutissiissutigineqarluni.

Ilungersunartumik napparsimasunut tarnip pissusaannit immikkut ilisimasalimmit ikiorneqarnissaannut aamma neqeroorut napparsimasunut qanoq isumaqarneranut tunngatillugu Kalaallit Peqqissartut Illuata misilittagai Naalakkersuisut takorusuppaat, taamaalilluta ilisimasat taakku siunissamut pilersarusiornermi atorsinnaaniassagatsigit.

Nalunngilarput nunatsinni tarnip pissusaannik ilisimasallit sulii amigaataasut, taamaattorli innuttaasut pisariaqartitsisut ikiornissaannut atatillugu tamanna unissutigissanngilarput. Taamaattumik inuiaqatigiit tapersersueqatigiinnissaannut ikioqatigiinnissaannullu tunngatillugu qanoq iliorsinnaanerisa ukkatarineqarnissaa pingaaruteqarpoq. Tassunga atatillugu nunami tarnikkut ikiorneqarnissamut aamma tarnikkut ikiueqqaarnermik ilinniarnissamut tunngatillugu periarfissat pioreersut erseqqissaatigineqarsinnaapput. Assersuutigalugu tarnikkut ikiueqqaarnermut tunngatillugu Kalaallit Røde Korsiat assigiinngitsunik pikkorissartitsisarpoq ilinniakkanillu neqerooruteqartarpoq, tamannalu suliaasaqarfimmut pitsaasumik tunniussivoq.

Taamatut oqaaseqarlunga oqallilluartoqarnissaa kissaatigaara.